



**Komunikadu Imprensa**  
**22 Jullu 2021**

## **Hafoin partisipa treinamentu husi JSMP, comunidade Suku Talimoro atu lori sira nia kazu alimentasaun ba iha tribunál**

Iha 15 Jullu 2021, JSMP kontinua realiza treinamentu ba membru konsellu suku no comunidade feto iha suku Talimoro, Postu Administrativu Ermera, Munisípiu Ermera kona-ba “Demokrasia, Kna’ar órgaun soberanu, partisipasaun públiku iha prosesu halo lei, Asesu ba Justisa formal no Liberdade asesu ba informasaun.

Partisipante sira ne’ebé partisipa iha treinamentu ne’e hamutuk ema na’in 21 kompostu husi feto 15 no mane 6 ne’ebé mai husi grupu feto potenciál sira, delegadu/a sira no membru konsellu Suku Talimoro (xefe aldeia sira).

Treinamentu ne’e ho objetivu atu hasa’e koñesimentu membru comunidade feto no konsellu suku sira nia koñesimentu kona-ba demokrasia, kna’ar órgaun soberanu, partisipasaun públiku iha prosesu halo lei, asesu ba justisa formal inklui hatene sira nia direitu kona-ba liberdade atu asesu ba informasaun.

“JSMP fiar katak ho treinamentu ne’e bele hasa’e koñesimentu comunidade feto no membru konsellu suku sira kona-ba sira nia direitu no obrigasaun sira iha nasaun demokrasia, prosesu halo lei, no asesu ba justisa formal, nune’e bele ajuda membru comunidade sira lori sira nia direitu no interese sira ne’ebé lei proteze ba iha justisa formal. Alende ne’e sira mós bele iha koñesimentu kona-ba direitu sira nian atu ho liberdade asesu ba informasaun,” dehan Diretora Ezekutiva JSMP, Sra. Ana Paula Marçal.

Materia treinamentu ne’ebé fahe iha sesaun treinamentu ne’e mak hanesan demokrasia, kna’ar órgaun soberanu, partisipasaun públiku iha prosesu halo lei, asesu ba justisa formal (direitu, lei, krime, kna’ar juis, prokuradór, defensór públiku/advogadu privadu no polísia) no direitu atu ho liberdade asesu ba informasaun tuir Konsitituisaun.

Iha sesaun treinamentu ne’e partisipante sira ativu teb-tebes hodi husu perguntas, fó komentáriu no hato’o sira nia rekomendasaun. Iha sesaun demokrasia partisipante sira husu perguntas relasiona ho regra kona-ba aplikasaun serka sanitária liu-liu relasiona ho validade kartaun swab tanba partisipante sira konfuzau ho durasaun loron ne’ebé la hanesan entre doutór sira (loron lima) no polísia (loron tolu). Kestaun seluk kona-ba orgaun sóberanu sira iha imunidade maibé povu laiha no iha sesaun sistema justisa formal partisipante sira kestiona kona-ba kazu feen tesi la’en nia orgaun seksuál iha Munisípiu Vikeke no kazu aman lakohi ona feen no abandona oan sira.

Rua Beco Lakateu, Aldeia Manu fuiik,  
Suku Colmera, Administrativu Vera Cruz  
Dili Timor Leste  
PoBox: 275

Telefone: 3323883 | 77040735

[www.jsmp.tl](http://www.jsmp.tl)

[info@jsmp.tl](mailto:info@jsmp.tl)

Facebook: [www.facebook.com/timorleste.jsmp](https://www.facebook.com/timorleste.jsmp)

Hatan ba preokupasaun kona-ba validade kartaun swab, JSMP hatan katak orgaun Estadu sira ne'ebé aplika lei (polísia sira) dala ruma sira iha *mis*-informasaun tanba tuir regra loloos rezultadu swab ne'e vale ba loron lima maibé dala ruma polísia sira ne'ebé serbisu iha sentru fronteira sira dala ruma la hetan esplikasaun klaru kona-ba prazu ne'e. Alende ne'e, JSMP mós esplika kona-ba direitu atu asesu ka hetan informasaun ho loloos tuir artigu 40 Konstituisaun.

Kestaun kona-ba imunidade ba orgaun membru Governu no Parlamentu Nasional, JSMP esplika katak Konstituisaun no Rejimentu Parlamentu Nasional fó duni imunidade ba membru Parlamentu Nasionál no membru Governu sira atu la responsabiliza ba nia aktu krime sira ne'ebé nia kastigu la aas liu tinan 2 no tinan 5 durante sira asume hela sira nia kna'ar, sira bele responsabiliza bainhira levanta ona sira nia imunidade iha parlamentu ka bainhira sira remata ona sira nia kargu nu'udar membru parlamentu ka governu. Signifika sira nafatin responsabiliza ba sira nia aktu krime hanesan povu bain-bain maibé depoisde levantamentu sira nia imunidade ka sira husik ona sira nia kargu hanesan membru parlamentu ka membru governu tanba ho razaun sira asumi hela knaar ba interese públiku.

Kestaun kona-ba kazu feen bele livre husi kulpa ba kazu tesi laen nia orgaun seksuál tanba deskonfia halo abuzu seksuál ba sira nia oan, JSMP hatan katak ema ne'ebé halo krime nia tenke responsabilidade ba ninia hahalok ne'e, maibe lei mós fó dalan atu ema ida bele livre husi ninia hahalok kuandu iha momentu nia halo krime ne'e justifika katak lejítima defeza (salva nia-an ka ema seluk) iha momentu hanesan. Tanba ne'e kona-ba kazu Vikeke nian, tribunál mak iha kompeténsia atu tetu faktu sira nune'e espera tribunál bele tetu faktu sira ho didi'ak inklui tetu sirkunstánsia sira liuliu liga ho razaun no momentu arguida prátika aktu ne'e hasoru vítima.

Parte seluk, JSMP mós aumezmu tempu husu ba partisipante sira kona-ba sira nia maneira iha rezolve kazu sira ho natureza violénsia doméstika no kazu sivíl liuliu kona-ba la kumpri obrigasaun alimentar, partisipante sira hatan katak antes iha Lei Kontra Violénsia Doméstika (LKVD), sira resolve iha nivel estrutura suku, maibé depoisde lei refere eziste, sira kuaze prosesa kazu ne'ebé akontese ba iha polísia no ministériu públiku. Enkuantu kona-ba obrigasaun alimentasaun, durante ne'e iha duni sira nia comunidade lubuk ida mak infrenta situasaun ne'e maibé sira la hatene atu lori ba ne'ebé tanba sira hatene ida ne'e la'os krime. Nune'e JSMP esplika katak bainhira la'en abandona nia feen no oan sira kazu ne'e ho karakter urjente bele lori kedan ba iha unidade polísia ba ema vulneravel (VPU) no ka ba direta iha ministériu públiku tanba sira mak reprezenta menór hodi lori prosesu ne'e ba iha tribunál bele hetan alimentasaun ba labarik sira no ikus mai inan- aman tenke fó alimentu ba nia oan sira tanba se sira la kumpri, sira sei sai fali arguidu ba krime la halotuir obrigasaun alimentar tuir lei penál.

Xefe Suku Talimoro Sr. Luis dos Santos iha nia intervensaun agradese tebes ba JSMP tanba fahe ona informasaun importante sira ne'e ba comunidade suku Talimoro, no fiar katak informasaun sira ne'ebé JSMP fahe ona, bele ajuda hariku liután membru konsellu suku sira nia kapasidade hodi hala'o sira nia serbisu ho di'ak iha comunidade no comunidade sira

hatene ona sira nia direitu no oinsa lori ba iha justisa formal kuandu iha violasaun ba sira nia direitu.

Hafoin treinamentu ne'e, partisipante feto ida, hateten katak agora dadaun nia hatene ona dalan atu lori nia bin nia oan sira atu hetan direitu ba alimentasaun nian ba iha justisa formal tanba antes ne'e sira la hatene no rezolve ona tuir família maibé laiha rezultadu.

Aktividade treinamentu ne'e realiza ho fundus mai husi União Europeia, parseiru no suporta husi CEPAD no treinamentu ne'e realiza husi JSMP.

Atu hetan informasaun kompletu, favór kontaktu:

Ana Paula Marçal

Diretora Ezekutiva JSMP

Diresaun e-mail: [ana@jsmp.tl](mailto:ana@jsmp.tl)

Telefone: (+670) 33238883 | 77040735

Website: <https://jsmp.tl>

[info@jsmp.tl](mailto:info@jsmp.tl)